



ГАРЧИГ

МОНГОЛ УЛСЫН ХУУЛЬ

266. Статистикийн тухай хуульд өөрчлөлт оруулах тухай 1209

267. Зээлийн ерөнхий хэлэлцээр соёрхон батлах тухай 1210

МОНГОЛ УЛСЫН ИХ ХУРЛЫН ТОГТООЛ

268. Монгол Улсын 2012 оны төсвийн гүйцэтгэл батлах тухай Дугаар 47 1210

МОНГОЛ УЛСЫН ЗАСГИЙН ГАЗРЫН ТОГТООЛ

269. Дүрэм батлах тухай Дугаар 139 1211

270. Журамд нэмэлт, өөрчлөлт оруулах тухай Дугаар 144 1215

МОНГОЛ УЛСЫН ХУУЛЬ

2013 оны 07 дугаар сарын 03-ны өдөр

Улаанбаатар хот

**СТАТИСТИКИЙН ТУХАЙ ХУУЛЬД
ӨӨРЧЛӨЛТ ОРУУЛАХ ТУХАЙ**

1 дүгээр зүйл.Статистикийн тухай хуулийн 7 дугаар зүйлийн 1 дэх хэсгийн “е” заалтыг дор дурдсанаар өөрчлөн найруулсугай:

“е/ нийгмийн үзүүлэлтийн түүвэр судалгааг 5 жил тутам;”

2 дугаар зүйл.Статистикийн тухай хуулийн 7 дугаар зүйлийн 1 дэх хэсгийн “ж” заалтыг хүчингүй болсонд тооцсугай.

**МОНГОЛ УЛСЫН
ИХ ХУРЛЫН ДАРГА**

З.ЭНХБОЛД



МОНГОЛ УЛСЫН ХУУЛЬ

2013 оны 07 дугаар
сарын 04-ний өдөр

Улаанбаатар
хот

ЗЭЭЛИЙН ЕРӨНХИЙ ХЭЛЭЛЦЭЭР СОЁРХОН БАТЛАХ ТУХАЙ

1 дүгээр зүйл. Монгол Улсын Засгийн газар, Японы Олон улсын хамтын ажиллагааны банк хооронд 2013 оны 6 дугаар сарын 06-ны өдөр байгуулсан экспортын зээлийн Ерөнхий хэлэлцээрийг Монгол Улсын Засгийн газрын өргөн мэдүүлснээр соёрхон баталсугай.

**МОНГОЛ УЛСЫН
ИХ ХУРЛЫН ДАРГА**

З.ЭНХБОЛД

МОНГОЛ УЛСЫН ИХ ХУРЛЫН ТОГТООЛ

2013 оны 07 дугаар
сарын 03-ны өдөр

Дугаар 47

Улаанбаатар
хот

Монгол Улсын 2012 оны төсвийн гүйцэтгэл батлах тухай

Монгол Улсын Их Хурлын чуулганы хуралдааны дэгийн тухай хуулийн 26 дугаар зүйлийн 26.6 дахь хэсэг, Төсвийн тухай хуулийн 8 дугаар зүйлийн 8.10.4 дэх заалтыг үндэслэн Монгол Улсын Их Хурлаас ТОГТООХ нь:

Монгол Улсын 2012 оны төсвийн гүйцэтгэлийн тэнцвэржүүлсэн орлогыг 3,386,515.4 сая /гурван их наяд гурван зуун наян зургаан тэрбум таван зуун арван таван сая дөрвөн зуун мянган/ төгрөгөөр, зарлагыг 4,379,479.5 сая /дөрвөн их наяд гурван зуун далан есөн тэрбум дөрвөн зуун далан есөн сая таван зуун мянган/ төгрөгөөр тус тус баталсугай.

**МОНГОЛ УЛСЫН
ИХ ХУРЛЫН ДАРГА**

З.ЭНХБОЛД



МОНГОЛ УЛСЫН ЗАСГИЙН ГАЗРЫН ТОГТООЛ

2013 оны 4 дүгээр
сарын 13-ны өдөр

Дугаар 139

Улаанбаатар
хот

Дүрэм батлах тухай

Тэсэрч дэлбэрэх бодис, тэсэлгээний хэрэгслийн эргэлтэд хяналт тавих тухай хуулийн 5.1.3-т заасныг үндэслэн Монгол Улсын Засгийн газраас ТОГТООХ нь:

1. Тэсэрч дэлбэрэх бодис, тэсэлгээний хэрэгслийн эргэлтийн асуудлаар санал, дүгнэлт гаргах үүрэг бүхий Мэргэжлийн зөвлөлийн дүрмийг хавсралт ёсоор баталсугай.

2. Энэхүү тогтоолын хэрэгжилтэд хяналт тавьж ажиллахыг Уул уурхайн сайд Д.Ганхуягт үүрэг болгосугай.

**МОНГОЛ УЛСЫН
ЕРӨНХИЙ САЙД**

Н.АЛТАНХУЯГ

УУЛ УУРХАЙН САЙД

Д.ГАНХУЯГ

Засгийн газрын 2013 оны 139 дүгээр
тогтоолын хавсралт

ТЭСЭРЧ ДЭЛБЭРЭХ БОДИС, ТЭСЭЛГЭЭНИЙ ХЭРЭГСЛИЙН АСУУДЛААР САНАЛ, ДҮГНЭЛТ ГАРГАХ ҮҮРЭГ БҮХИЙ МЭРГЭЖЛИЙН ЗӨВЛӨЛИЙН ДҮРЭМ

Нэг. Нийтлэг үндэслэл

1.1. Энэхүү дүрмийн зорилго нь тэсэрч дэлбэрэх бодис, тэсэлгээний хэрэгслийн эргэлтийн асуудлаар санал, дүгнэлт, зөвлөмж гаргах үүрэг бүхий геологи, уул уурхайн асуудал хариуцсан төрийн захиргааны төв байгууллагын дэргэдэх Мэргэжлийн зөвлөл (цаашид “Зөвлөл” гэх)-ийн ажлын зохион байгуулалт, бүрэн эрх, хариуцлагыг тодорхойлоход оршино.

1.2. Зөвлөл нь үйлдвэрлэлийн зориулалттай тэсэрч дэлбэрэх бодис, тэсэлгээний хэрэгслийн эргэлтийн асуудлаар мэргэжлийн санал, дүгнэлт, зөвлөмж гаргах чиг үүргийг хэрэгжүүлнэ. Зөвлөл нь орон тооны бус байна.



1.3. Зөвлөл нь Үндэсний аюулгүй байдлын үзэл баримтлал, Тэсэрч дэлбэрэх бодис, тэсэлгээний хэрэгслийн эргэлтэд хяналт тавих тухай хууль, Аж ахуйн үйл ажиллагааны тусгай зөвшөөрлийн тухай хууль, тэсэлгээний ажлын аюулгүй ажиллагааны нэгдсэн дүрэм, холбогдох хууль тогтоомж болон энэхүү дүрмийг дагаж мөрдөнө.

1.4. Зөвлөлийн бүрэлдэхүүн, ажиллах журмыг геологи, уул уурхайн асуудал эрхэлсэн Засгийн газрын гишүүн батална.

Хоёр. Зөвлөлийн үйл ажиллагааны зарчим

2.1. Зөвлөл нь үйл ажиллагаандаа дараахь зарчмыг баримтална:

2.1.1. хуулийн хүрээнд ажиллах;

2.1.2. хамтын ажиллагааны зарчимд тулгуурлан нэгдсэн шийдвэр гаргах;

2.1.3. зөвлөлийн шийдвэр, үйл ажиллагаа нь улс орны хэрэгцээ, шаардлага, зам, барилга, геологи, уул уурхайн чиглэлээр төрөөс баримталж байгаа бодлогод нийцсэн байх;

2.1.4. технологийн шинэчлэл, хүн амын болон байгаль орчны аюулгүй байдлыг дээдлэн үзэх;

2.1.5. хариуцлагатай, ил тод, шударга байх.

Гурав. Зөвлөлийн үйл ажиллагааны үндсэн чиглэл

3.1. Зөвлөлийн үйл ажиллагааны үндсэн хэлбэр нь хуралдаан байх бөгөөд дараахь асуудлуудыг хэлэлцэж санал, дүгнэлт, зөвлөмж гаргана:

3.1.1. тэсрэх бодисын үйлдвэрлэл, импорт, экспортын бодлого болон түүний хэрэгжилтийн талаар санал, дүгнэлт гаргах;

3.1.2. үйлдвэрлэлийн зориулалтаар тэсэлгээний ажил хийх, тэсрэх бодис, тэсэлгээний хэрэгсэл импортлох, экспортлох, худалдах, үйлдвэрлэх, тэсэлгээний ажил, үйлчилгээ хийх аж ахуйн үйл ажиллагааны тусгай зөвшөөрөл олгох талаар санал, дүгнэлт гаргах;

3.1.3. тэсэрч дэлбэрэх бодис, тэсэлгээний хэрэгслийн эргэлтэд хяналт тавих тухай хууль болон холбогдох хууль тогтоомж, дүрэм, заавар зөрчсөн хуулийн этгээдийн аж ахуйн үйл ажиллагааны тусгай зөвшөөрлийг түдгэлзүүлэх, хүчингүй болгох санал гаргах;



3.1.4. тэсрэх бодис, тэсэлгээний хэрэгсэл, пиротехникийн хэрэгслийн үйлдвэр, агуулахын зураг төсөл, техник-эдийн засгийн үндэслэлийг хэлэлцэж дүгнэлт гаргах;

3.1.5. тэсрэх бодис, тэсэлгээний хэрэгсэл, пиротехникийн хэрэгслийн үйлдвэрийг шинээр байгуулж ашиглалтад оруулахад санал, дүгнэлт гаргах;

3.1.6. шинэнэр төрлийн тэсэрч дэлбэрэх бодис, тэсэлгээний хэрэгсэл үйлдвэрлэх, импортлох, экспортлох, шинэ технологи нэвтрүүлэх, үндэсний стандарт бий болгох талаар санал, зөвлөмж гаргах.

3.2. Хуралдааныг Зөвлөлийн дарга зарлах бөгөөд нийт гишүүдийн гуравны хоёр нь ирснээр хүчинтэйд тооцогдоно. Зөвлөлийн хуралдаанд хүндэтгэн үзэх шалтгааны улмаас оролцож чадахгүй гишүүн саналаа заавал бичгээр өгнө.

3.3. Зөвлөлөөр хэлэлцсэн асуудлаар гарах санал, дүгнэлтийг гишүүдийн дийлэнх олонхийн саналаар шийдвэрлэнэ. Зөвлөлийн санал дүгнэлт нь тэмдэглэл хэлбэртэй байна.

3.4. Зөвлөлийн хуралдаанаас гарсан санал, дүгнэлтийг геологи, уул уурхайн асуудал эрхэлсэн Засгийн газрын гишүүнд хүргүүлнэ.

3.5. Зөвлөлийн хуралдаанаар энэхүү дүрмийн 3.1.2-т заасан зөвшөөрөл хүссэн хуулийн этгээдийн бүрдүүлсэн материал хуульд заасан шаардлагыг хангаагүй тохиолдолд асуудлыг хэлэлцэхгүй.

Дөрөв. Зөвлөлийн бүрэлдэхүүн, зохион байгуулалт

4.1. Зөвлөл нь дарга, орлогч дарга, гишүүд, нарийн бичгийн даргаас бүрдэнэ.

4.2. Зөвлөлийн дарга нь геологи, уул уурхайн асуудал хариуцсан төрийн захиргааны төв байгууллагын бодлогын хэрэгжилтийг зохицуулах нэгжийн дарга байна.

4.3. Зөвлөлийн орлогч дарга нь нь геологи, уул уурхайн асуудал хариуцсан төрийн захиргааны төв байгууллагын уул уурхайн бодлогын асуудал хариуцсан нэгжийн дарга байна.



4.4. Зөвлөлийн бүрэлдэхүүнд уул уурхай болон батлан хамгаалах асуудал хариуцсан төрийн захиргааны төв байгууллага, ашигт малтмал, мэргэжлийн хяналт, тагнуул, зэвсэгт хүчин, цагдаа болон онцгой байдлын асуудал хариуцсан төрийн захиргааны байгууллага, холбогдох их, дээд сургууль, мэргэжлийн холбоодын төлөөлөл орно.

4.5. Зөвлөлийн нарийн бичгийн дарга нь геологи, уул уурхайн асуудал хариуцсан төрийн захиргааны төв байгууллагын бодлогын хэрэгжилтийг зохицуулах нэгжийн тухайн асуудлыг хариуцсан ахлах мэргэжилтэн байна.

Тав. Зөвлөлийн бүрэн эрх

5.1. Зөвлөл нь дараахь үүргийг хэрэгжүүлнэ:

5.1.1. энэхүү дүрмийн 3.1-д заасан үйл ажиллагааг хэрэгжүүлэхтэй холбогдсон асуудлаар хуулийн этгээдээс шаардлагатай мэдээ, тайлан, судалгаа, баримт материалыг гаргуулан авах;

5.1.2. тэсэрч дэлбэрэх бодис, тэсэлгээний хэрэгслийн эргэлтийн бодлогыг боловсруулахад санал өгөх, оролцох;

5.1.3. энэхүү дүрмийн 3.1.2-т заасан зөвшөөрөл хүсч ирүүлсэн хуулийн этгээдийн материалыг үнэн зөв, бүрэн гүйцэд нягтлан шинжлэх;

5.1.4. хуулийн хэрэгжилтэд шинжилгээ хийж, үнэлгээ өгөх, хариуцсан чиг үүрэгтэй холбоотой хууль, дүрэм, журмыг сурталчлах;

5.1.5. зөвлөлийн хариуцсан асуудлаар хэрэглэгчийг мэдээ, мэдээллээр хангах.

5.2. Зөвлөлийн гишүүн дараахь үүрэгтэй:

5.2.1. мэргэжлийн дагуу санал, дүгнэлт гаргах;

5.2.2. хуулийн этгээдтэй холбоо бүхий мэдээллийн нууцыг хадгалах.

5.3. Зөвлөлийн гишүүн дараахь эрхтэй:

5.3.1. тухайн асуудлаар гарах шийдвэртэй санал нийлэхгүй цөөнх болсон тохиолдолд энэ тухайгаа хуралдааны тэмдэглэлд тусгуулах;



5.3.2. тэсэрч дэлбэрэх бодис, тэсэлгээний хэрэгслийн эргэлттэй холбогдох заавар, зөвлөмж, гарын авлага боловсруулахад оролцох.

Зургаа. Хариуцлага

6.1. Зөвлөл, зөвлөлийн гишүүн нь дараахь хариуцлагыг хүлээнэ:

6.1.1. гишүүн нь хэлэлцэж байгаа асуудлаар өөрийн гаргасан саналын үнэн зөвийг Зөвлөлийн өмнө бүрэн хариуцах;

6.1.2. гишүүн нь энэхүү дүрмийн 5.1.1 дэх хэсэгт заасан мэдээ, тайлан, судалгаа, баримт материалыг гуравдагч этгээдэд задруулсан бол Зөвлөлийн бүрэлдэхүүнээс хасах саналыг зөвлөл гаргаж, геологи, уул уурхайн асуудал эрхэлсэн Засгийн газрын гишүүнд тавьж шийдвэрлүүлж, төлөөлж байгаа байгууллагад нь мэдэгдэх;

6.1.3. гишүүн нь энэхүү дүрмийг ноцтойгоор зөрчсөн нь эрүүгийн болон захиргааны хариуцлага хүлээлгэхээр бол асуудлыг холбогдох хууль тогтоомжийн дагуу шийдвэрлэх.

МОНГОЛ УЛСЫН ЗАСГИЙН ГАЗРЫН ТОГТООЛ

2013 оны 4 дүгээр
сарын 13-ны өдөр

Дугаар 144

Улаанбаатар
хот

Журамд нэмэлт, өөрчлөлт оруулах тухай

Ахмад настны нийгмийн хамгааллын тухай хуулийн 5.2-т заасныг үндэслэн Монгол Улсын Засгийн газраас ТОГТООХ нь:

1. “Журам батлах тухай” Засгийн газрын 2012 оны 5 дугаар сарын 30-ны өдрийн 185 дугаар тогтоолын 2 дугаар хавсралтаар баталсан “Ахмад настанд тусламж, хөнгөлөлт үзүүлэх журам”-ын 2 дахь хэсэгт дор дурдсан агуулга бүхий 2.25 дахь заалт нэмсүгэй:

“2.25. Ахмад настан нь жилд нэг удаа ахмадын зориулалттай амралт, сувиллын газарт амарч сувилуулсны дараагаар сум, хорооны нийгмийн ажилтанд энэхүү журмын 3.3-т заасан баримт бичгийг бүрдүүлэн өгч, эрхийн бичгийн үнийн хөнгөлөлтийг авна.”



2. Мөн журмын 2 дахь хэсгийн 2.24 дэх заалтыг хүчингүй болсонд тооцсугай.

3. Энэ тогтоолыг 2013 оны 4 дүгээр сарын 15-ны өдрөөс эхлэн дагаж мөрдсүгэй.

**МОНГОЛ УЛСЫН
ЕРӨНХИЙ САЙД**

Н.АЛТАНХУЯГ

**ХҮН АМЫН ХӨГЖИЛ, НИЙГМИЙН
ХАМГААЛЛЫН САЙД**

С.ЭРДЭНЭ

Хаяг:

“Төрийн мэдээлэл” эмхэтгэлийн редакци.
Улаанбаатар-14201, Төрийн ордон 124 тоот
И-мэйл: turiin_medecelel@parliament.mn

Утас: 262420

Хэвлэлийн хуудас: 0.5

Индекс: 14003